

d'un festin. Je ne vis de ma vie chose pareille, il y entrèrent 20. hommes & s'entafferent presque les vns sur les autres, le malade mesme s'i traina quoi qu'avec beaucoup de peine, & fut de la troupe, il chanta aussi assez long temps, & au milieu des ardeurs de cette fuerie il demanda de l'eau pour se rafraichir, il en bût vne partie & ietta le reste sur son corps. Voilà vn excellent remede pour vn malade à l'extremité; aussi le lendemain ie le trouuai. en bel estat. De fait ce fut vn bel estat pour lui, puisque Dieu lui fit pour lors la grace de conceuoir l'importance des affaires de son salut, & à moy de me mettre en la bouche des paroles pour lui expliquer les principaux de nos mystere. Comme ie lui disois que le Baptesme n'estoit pas vn remede pour la santé du corps, nous le sçauons bien me dit-il, lui, & vn des anciens qui se trouua lors que ie l'instruisois, nous le sçauons asses: c'est vn grand auantage pour nous que dans ce bourg ils font pleinement informez de ce que nous pretendons par le Baptesme. La fille suiuit bien tost l'exemple de son pere, qui l'exhorta lui mesme à demander le Baptesme, [225] à l'occasion de la mort de leurs enfans qui auoient esté baptifez. Le pere mourut le iour de la Pentecoste, pour sa fille il semble qu'elle se porte vn peu mieux: i'auois bien de l'obligation à ce bon vieillard, de m'auoir amené en ce pais, & ie me resioiis maintenant de ce qu'il a pleu à Dieu se feruir de moi pour le conduire dans le ciel. Ce Sauvage auoit des qualitez qui le rendoient tout à fait aimable: ie ne me fus iamais imaginé pouuoir trouver en vn barbare tant de douceur & de debonnaireté, pendant mon voyage il me traittoit comme son propre fils.